

POPERA GA EPÉCHIUWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Epéchiuarü iānewa yexmagŭxŭ

¹ Pa Chaueneēgŭ ya Epéchiuwa Ngēxmagŭxe, choma i Pauru nixŭ i pexcèx chanaxŭmatŭxŭ i ñaã popera. Rü choma i Pauru chixŭ i Tupana choxŭ yaxuxŭ na Ngechuchu ya Cristu choxŭ muxŭcèx na duŭxŭgŭmaã nüxŭ chixuxŭcèx i norü ore. Rü pexcèx chanaxŭmatŭ i guxâma i pema ya Epéchiuarü iānewa ngēxmagŭxe rü Tupanaärü duŭxŭgŭ ixŭgŭxe rü Ngechuchu ya Cristuaxŭ yaxōgŭxe. ² Rü chanaxwexe i pexŭ narüngŭxēē rü pexŭ nataāxēē ya Tanatŭ ya Tupana rü tórü Cori ya Ngechuchu ya Cristu.

Tupana rü poraãcü tŭxŭ narüngŭxēē erü Cristuarü duŭxŭgŭ tixŭgŭ

³ Rü name nixŭ i nüxŭ ticuèxŭgŭ ya Tanatŭ ya Tupana ya tórü Cori ya Ngechuchu ya Cristunatŭ ixŭcü. Erü nüma ya Tupana rü Cristugagu tŭxna nanaxã i naguxŭraŭxŭ i ngŭxēēgŭ i ũnèxŭ i dauxŭguxŭ i naanewa taxcèx ne namugŭxŭ. ⁴⁻⁵ Rü tautama naãne ũxgu, rü Cristugagu Tupana tŭxŭ nade na napèxewa ixüünegŭxŭcèx rü na nataxuxŭcèx i tórü chixexŭ i napèxewa. Rü Tupana rü poraãcü tŭxŭ nangechaŭ. Rü yemacèx

nuxcūmamatama tūxū naxuneta na naxācūgūxū tūxū nadexūcèx Ngechuchugagu. Rū yemaācū nanaxū yerū yema nixī ga norū ngúchaŭ. ⁶ Rū ngēmacèx name nixī i guxūguma nūxū ticuèxūūgū ya Tupana. Erū nūma rū poraācūxūchima tamaā namecūma rū poraācū tūxū narūngūxēē ga yexguma taxcèx nūma namuāxgu ga Nane ya nūxū nangechaŭxūchicū. ⁷ Rū Tupana rū poraācū tūxū nangechaŭ, rū yemacèx nanamu ga Nane na taxcèx nayuxū rū nagū inabaxū na yemaācū tūxū ínanguxūxēēúcèx rū tūxū nūxū nangechaŭxūcèx ga tórū pecadugū. ⁸ Rū Tupana tūxū nūxū nadauxēē na ñuxācū poraācū tūxū nangechaŭxū ga yexguma tūxna naxāāxgu ga guxūma ga tórū cuèx na taāxū icuáxūcèx rū tūxū natauxchaxūcèx i norū ore. ⁹ Rū tūxū nūxū nacuèxēē ga norū ngúchaŭ ga noxri nūxīcatama nūxū nacuáxū. Rū yema norū ngúchaŭ ga nuxcūmaxūchima Cristumaā nagu naxīnūxū ga Tupana, rū yema nixī ga ñoma ga naānewa na namuāxū na tūxū yamaxēxēēxūcèx. ¹⁰ Rū yema nagu naxīnūxū nixī na Cristumēxēwa nangēxmaxēēāxū i guxūma i daxūguxū i naānewa ngēxmaxū rū guxūma i ñoma i naānewa ngēxmaxū. Rū ngēmaācū tá nanaxū ya Tupana i ngēxguma nawa nanguxgu na yanguxēēāxū. ¹¹ Yerū naxūpa ga ñoma ga naane naxūxū ga Tupana, rū woetama tomaā nanaxuegu na Cristugagu tanayauxgūxūcèx i ngēma maxū i taguma gúxū i nūma toxna naxāxchaŭxū na aixcūma naxcèx tamaxēxūcèx. Rū aixcūma yemaācū nanaxū yerū yema nixī ga norū ngúchaŭ ga Tupana ya guxūma ūcū, ngēma nūma nagu naxīnūxūācūma. ¹² Rū yemaācū

Tupana tomaã nanaxuegu na toma i toxira Cristuaxŭ yaxõgũxe naxcèx tamaxẽxũcèx rü nüxŭ ticuèxüũgũxũcèx naxcèx i norü pora i üünexŭ. ¹³ Rü yexgumarüŭ ta ga pema i EpéchiucŭĀxgü, rü yexguma nüxŭ pexĩnüëgu ga yema ore i aixcüma ixĩxŭ i tüxŭ maxẽxẽxŭ, rü yexguma Cristuaxŭ peyaxõgũgu, rü namücügü pixĩgü. Rü Tupana ga tamaã ixunetacü na tüxna namuãxũcèx i Naãe i Üünexŭ, rü marü pexna nanamu i ngẽma Naãe na nüxŭ pecuáxũcèx na aixcüma norü duũxũgü pixĩgũxŭ. ¹⁴ Rü ngema Naãe i Üünexŭ ga Tupana tüxna muxŭ, rü ngemaawa nixĩ i nüxŭ icuáxŭ na aixcüma Tupana tá tüxna naxãxŭ i guxŭma i ngema tamaã inaxunetaxŭ. Rü ngẽxguma wena núma naxũxgu ya Cristu na nügũxŭtawa tüxŭ nagagũxũcèx rü aixcüma tá tanayaxu i guxŭma i ngema Tupana tomaã nüxŭ ixuxü. Rü ngẽmacèx name nixĩ na nüxŭ icuèxüũgũxŭ ya Tanatü ya Tupana ya üxü necü.

Pauru rü yaxõgũxũcèx nayumüxẽ.

¹⁵⁻¹⁶ Rü ngẽmacèx, ñuxma na nüxŭ chacuáxŭ na aixcüma tórü Cori ya Ngechuchuaxŭ peyaxõgũxŭ rü na aixcüma nüxŭ pengechaũgũxŭ i guxŭma i ngẽma togü i Tupanaãrü ixĩgũxŭ, rü ngẽmacèx taguma nüxŭ charüchau na pexcèx moxẽ nüxna chaxãxŭ rü pexna chacuèxãchixŭ i chorü yumüxẽwa. ¹⁷ Rü ngẽxguma namaã chideaxgu ya Tanatü ya Tupana ya mexẽchicü ya Nanatü ya tórü Cori ya Ngechuchu ya Cristu, rü naxcèx nüxna chaca na pexna naxããxũcèx i ngẽma cuèx i Naãe i Üünexŭwa ne ũxŭ. Rü ngẽma Naãe i Üünexŭ tá nixĩ i pexcèx nangoxẽxŭ i Tupanaãrü ore i

mexŭ na yexeraãcŭ nŭxŭ pecuáxŭcèx ya Tupana.
 18 Rŭ Tupanana naxcèx chaca na nŭmatama pexŭ yangoxnaãèxèèxŭcèx, na nŭxŭ pecuáxŭcèx na tacŭ yŭxŭ i ngēma ípenanguxèèxŭ i naxcèx pexŭ nadexŭ. Rŭ nŭxna naxcèx chaca na pexŭ nŭxŭ nacuèxèèxŭcèx na ñuxãcŭ namexèchixŭ i ngēma maxŭ i taguma gúxŭ i nŭma norŭ duŭxŭgŭcèx namexèèxŭ i daxŭguxŭ i naãnewa. 19-20 Rŭ ngēxgumarŭŭ ta rŭ nŭxna naxcèx chaca na pexŭ nŭxŭ nacuèxèèxŭcèx na ñuxãcŭ nataxŭchixŭ i norŭ pora i tawa ngēxmaxŭŭ rŭ namaã tŭxŭ nangŭxèèxŭ i yixema na yaxŭgŭxŭ. Rŭ ngēmatama pora i taxŭmaã nixŭ ga napuracŭxŭ ga Tupana ga yexguma yuwa Cristuxŭ ínadaxèègu rŭ daxŭguxŭŭ ga naãnewa nagaãxgu rŭ nŭgŭarŭ tŭgŭnecŭwawa yanatoxèèãgu na guxãarŭ ãèxgacŭ yŭxŭcèx.
 21 Rŭ yemaãcŭ guxŭetŭwa nanayexmaxèè. Rŭ ngēmacèx i ñuxma rŭ Cristumèxèwa nangèxmagŭ i guxŭma i daxŭguxŭ i naãnecŭãx i ãèxgacŭgŭ rŭ guxŭma i ñoma i naãnecŭãx i ãèxgacŭgŭ. Rŭ ngēmaãcŭ naxmèxwa nangèxmagŭ i guxŭma i pora i ñuxma ngèxmagŭxŭŭ rŭ guxŭma i pora i tá ngèxmagŭxŭŭ. Rŭ ngēmaãcŭ i nŭma rŭ guxŭŭ i ãèxgacŭgŭarŭ ãèxgacŭ tá nixŭ i guxŭguma.
 22 Rŭ yemaãcŭ ga Tupana rŭ marŭ Cristumèxèwa nanayexmagŭxèè ga guxŭma. Rŭ yexgumarŭŭ ta Cristuxŭ ningucuchixèè na guxŭma i yaxŭgŭxŭèru na yŭxŭcèx. 23 Rŭ ñuxma rŭ guxŭma i yaxŭgŭxŭŭ rŭ wŭxigu Cristuarŭ nixŭgŭ. Rŭ nŭma nixŭ i tawa nangèxmaxŭŭ i guxãma i yixema i nŭxŭŭ na yaxŭgŭxŭŭ. Rŭ ngēxgumarŭŭŭ ta nŭma nixŭ i nangèxmaxèèãxŭŭ i guxŭma i tacŭ i ngèxmaxŭŭ i guxŭwama.

2

Tamaxē erü Tupana tüxü nangechaü

¹ Rü ūpa ga pema rü perü pecadugagu rü perü chixexügagu ñoma peyuexürüü pixīgü. ² Yerü ga pema rü nagu pexī ga yema chixexü i ñoma i naānecūāx i duūxügü nagu īxü. Rü pema rü naga pexīnūē ga Chataná i ngoxogüarü āēxgacü ixīxü. Rü nüma nixī i nüxü nangúchaūxēēāxü na chixexü naxügüxücèx i guxūma i ngēma duūxügü i tama Tupanaga ĩnūēxü. ³ Rü guxāma ga yixema rü yemaācü chixri tamaxē ga ūpa. Rü tanaxü ga tóxrütama ngúchaü, rü nagu taxī ga yema taxüne naxwèxexü rü yema taāē naxwèxexü. Rü yemagagu yema togü ga duūxügü ga chixexü ügüxürüü nawa taxügü i ngēma poxcu i āücūmaxüchixü i Tupana mexēēxü. ⁴ Natürü ga Tupana rü poraācü nüxü tangechaütümüügü rü poraācü tüxü nangechaü. ⁵ Rü yemacèx, woo tórü pecadugagu ñoma iyueuxürüü tixīgü, natürü ga Tupana rü tüxna nanaxā ga maxü ga yexguma Cristuxü ĩnadaxēēgu. Rü ñuxma rü pexü nangēxma i maxü i taguma gúxü, erü Tupana pemaā namecūma. ⁶ Rü yema na Ngechuchu ya Cristuxü wena namaxēēxürüü rü tüxü rü ta namaxēxēē ga Tupana. Rü yemaācü nanaxü na yixema rü ta Cristumücügü ixīgüxücèx, rü namaā āēxgacügü ixīgüxücèx i daxüguxü i naānewa. ⁷ Rü yemaācü nanaxü ga Tupana na guxügutāma duūxügüxü nawéaxücèx na ñuxācü Cristugagu poraācü tüxü nangechaüxü rü tamaā namecūmaxü. ⁸ Rü yemaācü pemaā namecūma ga Tupana. Rü yemacèx penayaxu ga maxü i taguma gúxü yerü

peyaxōgü. Rū ngēma maxū rü taxucürüwama pegünatama penaxā, natürü Tupana nixī ga pexna naxāmarecū ga yema. ⁹ Rū tama ṭacū i mexū i pexūxūgagu nixī i pexū nangēxmaxū i ngēma maxū, natürü Tupana nixī ya pexna naxāmarecū na ngēmaācū taxúema tūgū icuèxūxūcèx. ¹⁰ Rū Tupana nixī ga tūxū maxēxēēcū. Rū ñuxma rü tūxū nangēxma i ngēma maxū yerü Ngechuchu ya Cristu tórü pecaducèx nayu. Rū Tupana tūxna nanaxā i ngēma maxū na meā imaxēxūcèx rü mexū ixügūxūcèx. Rū yemaācū tūxū narüngūxēē ga Tupana yerü woetama nuxcūmaxūchima marü yemagu narüxīnū.

Cristu nixī ya yigūmaā tūxū rüngūxmüēxēēcū

¹¹⁻¹² Rū ngēmacèx i pema na tama Yudíugü pixīgūxū, rü name nixī i nüxna pecuèxāchie na tama toxrūü na pixīgūxū ga noxri rü tama Tupanaxū na pecuèxgūxū. Rū yema na tama toxrūü pixīgūxū rü yemacèx ga toma ga Yudíugü i togü na ítawiechèxmüpēxechiraūgūxū, rü nüxū tixugüe na pema rü tama Tupanapēxewa na pimexū yerü tama toxrūü pegü ípewiechèxmüpēxechiraūgü. Rū yexguma ga pema rü tama Cristuxū pecuèxgü, yerü tama Tupanaārü duūxūgü i Yudíugütanūxū pixīgü. Rū tama nüxū pecuèxgü ga Tupana núma na namuxū ga Nane na duūxūgüarü pecaducèx nayuxūcèx na nüxna naxāāxūcèx i maxū i taguma gúxū. Rū woo ga yema mexūgü ga Yudíugūmaā inaxunetaxū ga Tupana, rü taxucürüwa penayaxu. Yerü ñoma ga naānewa rü pemaxēmare, rü tama nüxū pecuèx ga ṭacū chi pexū na üpetūxū ga yexguma chi peyuegu

yerü tama Tupanaxŭ pecuèx. ¹³ Natürü woo ga noxri rü tama Tupanaxŭ na pecuáxŭ, natürü i ñuxma rü nügüxütawa pexŭ nagagü. Rü Ngechuchu ya Cristuarü duŭxŭgü pixŭgü yerü pexcèx nayu rü nagü inanaba. ¹⁴⁻¹⁵ Rü ñuxma rü Cristu nixŭ ya tüxŭ rüngüxmüèxècŭ. Rü noxri ga toma ga Yudŭgü rü pexchi taxaie yerü tama toxrŭŭ Yudŭgü pixŭgü. Natürü i ñuxma rü Cristu marü yigümaã tüxŭ narüngüxmüèxèè. Rü yemaãcŭ wüxitama i duŭxŭgüxŭ tüxŭ nixŭgüxèè rü inayanaxoxèè na yigüarü uwanü ixŭgüxŭ. Rü yexguma nayuxgu ga Cristu rü tüxŭ ínangüxŭxèè na tama natüüwa iyexmagüxŭcèx ga yema nuxcümaŭgüxŭ ga mugü ga toma ga Yudŭgü nagu taxŭxŭ. Rü wüxitama i duŭxŭgü i ngexwacaxŭxŭ tüxŭ nixŭgüxèè i toma i Yudŭgü na tixŭgüxŭ rü pema i tama Yudŭgü na pixŭgüxŭ. Rü yemaãcŭ nanaxü na guxãma i yixema rü norü duŭxŭgü na ixŭgüxŭcèx. Rü yemaãcŭ yigümaã tüxŭ inarüngüxmüèxèè. ¹⁶ Rü yexguma curuchagu nayuxgu ga Cristu, rü inayanaxoxèè ga yigüchi na ixaie xŭ. Rü yemaãcŭ ga Cristu rü Tupanamaã tüxŭ inarüngüx-müèxèè, rü wüxitama i duŭxŭgüxŭ tüxŭ nixŭgüxèè. ¹⁷ Rü yexguma Cristu núma ŭxgu, rü taxcèx núma nanange ga ore ga mexŭ ga marü yigümaã rü Tupanamaã na rüngüxmüèxŭ. Rü yema ore rü toxcèx nixŭ i toma i Yudŭgü ga toxira Tupanaxŭ na tacuáxŭ. Rü yema ore rü pexcèx rü ta nixŭ ga woo tama Tupanaxŭ na pecuèxgüxŭ ga noxrix. ¹⁸ Rü ñuxma rü guxãma i yixema rü Cristugagu tüxŭ natauxcha na Tanatü ya Tupanana ingaicamagüxŭ. Rü

ngēmatama Naãē i Üünexŭ nixĩ i tŭxŭ rŭngŭxēēxŭ na nŭxna ingaicamagŭxŭcèx ya Tanatŭ ya Tupana. ¹⁹ Rŭ ngēmacèx i pema rŭ woo tama Tupanaxŭ pecuèxgŭ ga noxrix, rŭ woo tama norŭ duŭxŭgŭ pixĭgŭ ga yexguma, natŭrŭ tama ngēmaãcŭ pixĭgŭ i ñŭxmax. Erŭ ñŭxma rŭ natanŭxŭ pixĭgŭ i guxŭma i ngēma duŭxŭgŭ i Tupanaãrŭ ixĭgŭxŭ. Rŭ aixcŭma Tupanaxãcŭgŭxŭchi pixĭgŭ i ñŭxmax. ²⁰⁻²² Guxãma i pema rŭ wŭxi ya ĩpata ya mexŭne ya Tupana nawa maxŭne pixĭgŭ. Rŭ ngēma cementu i ladriyu naetŭgu nugŭxŭ, rŭ ngēma rŭ Tupanaãrŭ ngúexŭgŭ ga imugŭxŭ rŭ norŭ orearŭ uruŭgŭ nixĩ. Rŭ yima ladriyu ya nŭxirama cementuétŭwa ixŭcuchicŭ rŭ Cristu nixĩ. Rŭ ngēma inanaxŭgŭ na naxŭãxŭ ya guxŭnema ya yima ĩ. Rŭ dŭxwa ningŭ na wŭxi ya tupauca ya taxŭne ya Cristugagu ũnenene na yĩxŭ. Rŭ ngēmaãcŭ i pema na Cristuarŭ pixĭgŭxŭ rŭ wŭxigu tomaã peyanguxēē ya wŭxi ya tupauca ya taxŭne i ngextá Tupanaãē i Üünexŭ ĩmaxŭxŭwa.

3

*Tupana rŭ Pauruxŭ namu na ore i mexŭxŭ yax-
uxŭ namaã ga yema duŭxŭgŭ ga tama Yudŭgŭ
ixĭgŭxŭ*

¹ Rŭ ñŭxma na yemaãcŭ Tupana pexŭ rŭngŭxēēxŭ, rŭ choma i Pauru rŭ pexcèx chayumŭxē. Rŭ pemaã nŭxŭ chixu rŭ nŭma poxcupataŭwa changēxma erŭ Ngechuchu ya Cristuarŭ duŭxŭ chixĩ. Rŭ nuxma chapoxcu erŭ guxŭwama nŭxŭ chixuchiga na pema rŭ ta pexŭ nangēxmaxŭ i pechica i Tupanaxŭtawa

woo na tama Yudíugü pixĩgüxũ. ² Rũ maneca marũ nüxũ pecuáchiga na ñuxãcü Tupana choxũ nangechaũãcüma choxũ muxũ na pexũ charüngũẽxũcèx rü pemaã nüxũ chixuxũcèx i norũ ore i mexũ. ³ Rũ Tupana chomaã nanangoxẽẽ rü choxũ nüxũ nacuèxẽẽ ga yema ore ga pechiga ga noxri nüxĩcatama nüxũ nacuáxũ. Rũ yemachiga nixĩ ga írarüwa marũ pexcèx chanaxümatüxũ ga noxrix. ⁴ Rũ yexguma pexcèx chanaxümatügu rü pemaã nüxũ chixu ga yema noxri èxũguxũ ga ore i ñuxãcü Tupana rü Cristugagu duũxũgüxũ namaxẽxẽxũ. Rũ ngẽxguma meã nawa pengúegu i ngẽma popera rü tá nüxũ pecuèx na aixcüma yĩxũ ga yema ore ga noxri èxũguxũ ga nachiga pexcèx chaxümatüxũ. ⁵ Rũ yema nixĩ ga ore ga èxũguxũ ga Tupana taxúexũma meã nüxũ nacuèxẽẽxũ ga noxrix. Natürü i ñuxma rü ngẽma Naãe i Üünexũ rü marũ nanangoxẽẽ i ngẽma ore naxcèx i Tupanaärü duũxũgü i üünexũ i yamugüxũ rü norũ orearü uruũgü. ⁶ Rũ ñuxma rü tá pemaã nüxũ chixu i ñuxãcü na yĩxũ i ngẽma ore ga noxri èxũguxũ. Rũ dücax, woo tama Yudíugü pixĩgü natürü i ñuxma rü pexcèx rü ta nixĩ i ngẽma maxũ i taguma gúxũ ga noxri Tupana tomaã ixunetaxũ. Rũ ñuxma i pema rü ta norũ duũxũgü pixĩgü. Rũ pexcèx nixĩ i guxũma i ngẽma Tupanaärü unetagü ga noxri tomaã nüxũ yaxuxũ. Rũ ngẽmaãcü i ñuxma rü Ngechuchu ya Cristugagu pexũ nangẽxma i guxũma i ngẽma mexũgü erü peyaxõgü i norũ ore i tüxũ maxẽxẽẽxũ. ⁷ Rũ woo taxuwama chame na chanaxüxũcèx i norũ puracü, natürü ya Tupana rü choxũ namuãma rü choxũ naporaxẽẽ

na nüxŭ chixuxŭcèx i ngēma norü ore i mexŭ.
 8 Rü chaugŭcèx i Tupanapēxewa rü choma nixŭ
 i guxŭ i norü duŭxŭgŭarŭ ñaxtŭwaama chaxŭxŭ.
 Rü woo ngēmaācŭ chixŭ, natŭrŭ Tupana choxŭ
 nangechaŭ rü choxna nanaxā i ngēma puracŭ
 i mexŭ na ngēma tama Yudŭgŭ ixŭgŭxŭmaā
 nüxŭ na chixuxŭcèx i norü ore i mexŭ na
 ñuxācŭ namexēchixŭ rü taguma iyagŭxŭ ga
 yema taxcèx naxŭxŭ ga Cristu. 9 Rü nüma ga
 Tupana ya guxŭārŭ ũruŭ ixŭcŭ, rü choxŭ namu
 na guxŭ i duŭxŭgŭxŭ nüxŭ chacuèxēèxŭcèx na
 ñuxācŭ yŭxŭ i ngēma norü ngŭchaŭ ga nuxcŭma
 èxŭgŭxŭ ga noxri nüxŭcatama nüxŭ nacuáxŭ.
 Rü ngēma norü ngŭchaŭ nixŭ i Cristugagu tŭxŭ
 na namaxēxēèxŭ. 10 Rü yemaācŭ choxŭ namu
 ga Tupana na ngēma duŭxŭgŭ i tama Yudŭgŭ
 ixŭgŭxŭmaā nüxŭ chixuxŭcèx i ore i mexŭ na
 yaxōgŭāxŭcèx. Rü nüma ya Tupana nanaxwèxe
 na yaxōgŭāxŭ na ngēmaācŭ guxŭma i āèxgacŭgŭ
 i daxŭcŭĀx nüxŭ nadaugŭxŭcèx na ñuxācŭ nüxŭ
 nacuèxŭchixŭ ga Tupana ga yexguma duŭxŭgŭaxŭ
 natauxchaxēèāgu na naxŭtawa nangugŭxŭcèx.
 11 Rü yemaācŭ nüxŭ nanatauxchaxēè ga Tupana
 yerŭ woetama nuxcŭmaxŭchima guxŭguma nagu
 narŭxŭnŭ na tórŭ Cori ya Ngechuchu ya Cristugagu
 tá na namaxēxēèāxŭ i duŭxŭgŭ. Rü yemaācŭ
 nayanguxēè. 12 Rü ñuxma na Cristuarŭ duŭxŭgŭ
 ixŭgŭxŭ rü nüxŭ na yaxōgŭxŭ, rü tŭxŭ natauxcha
 na Tupanana ingaicamagŭxŭ rü taxucèxma nüxŭ
 na imuŭèxŭ. 13 Rü ngēmacèx i ñuxma na pexcèx
 ngŭxŭ chingexŭ rü pexŭ chacèèxŭ na tama
 chauxcèx pexoegaāègŭxŭcèx. Erŭ ngēma ngŭxŭ
 na chingexŭ i ñuxma rü perŭ meruŭ nixŭ i ngēma.

Cristu rü poraãcü tüxũ nangechaũ

¹⁴ Rü ngẽmacèx, ngẽxguma nagu charüxĩnũgu na ñuxãcü Tanatü ya Tupana taxcèx namexẽẽxũ na naxãcügü ixĩgüxücèx, rü napẽxegu chacaxãpüxü na nüxũ chicuèxüũxücèx. ¹⁵ Rü nüma nixĩ i Nanatü yiĩxũ i guxũma i norü duũxüğü i ñoma i naãnewa rü daxüguxũ i naãnewa ngẽxmagüxũ. ¹⁶ Rü Tanatü ya guxũguma poraãcü tamaã mecümacüna chaca na Naãẽ i Üünexũãrũ ngüxẽẽmaã pexũ naporaexẽẽxücèx na aixcüma peporaexücèx i perü maxũwa. ¹⁷⁻¹⁸ Rü ngẽxgumarüũ ta nüxna naxcèx chaca na perü õgagu pewa namaxũxücèx ya Cristu. Rü ngẽxguma ngẽmaãcü perü maxũwa peporaegu rü pexũ nangẽxmagu i ngẽma ngechaũ i aixcüma ixĩxũ, rü tá wüxigu guxũma i yaxõgüxũmaã nüxũ pecuèx na ñuxãcü nataxüchixũ i norü ngechaũ i namaã tüxũ nangechaũxũ ya Cristu. ¹⁹ Rü woo tama yanguxgu i tórü cuèx na nüxũ icuáxücèx na nañuxraũxũ i ngẽma ngechaũ i namaã Cristu tüxũ ngechaũxũ, natürü Tupanana naxcèx chaca na pexcèx nangoxẽẽãxücèx na ñuxãcü na yiĩxũ i ngẽma ngechaũ na aixcüma pewa nangẽxmaxũ i guxũma i Tupanacümagü. ²⁰ Rü ñuxma rü name nixĩ i guxãma i yixema rü nüxũ ticuèxüũgü ya Tupana. Erü nüma rü nüxũ nangẽxma i pora na naxüãxũ i guxũma i ngẽma naxcèx íçaxũ rü éxna nagu rüxĩnüèxũãrũ yexeraxüchi. Rü ngẽma norü pora i tawa ngẽxmaxũmaã nixĩ i naxüãxũ i guxũma i ngẽma. ²¹ Rü ñuxma rü name nixĩ i guxũma i norü duũxüğü i yaxõgüxũ rü guxũgutáma Tupanaxũ nicuèxüũgü naxcèx i ngẽma Ngechuchu ya Cristu üxũ. Rü ngẽmaãcü yiĩ.

4

Tupanaãē i Üünexŭ rŭ wŭxigutama tŭxŭ narŭxŭnŭxēē

¹ Rŭ ñuxma na ngēmaãcŭ Tupana tŭxŭ rŭngŭxēēxŭ, rŭ choma i Cristugagu na chapoxcuxŭ, rŭ pexŭ chacèexŭ na Tupana naxwèxexŭãcŭma meã pemaxēxŭ. Rŭ name nixŭ i ngēmaãcŭ pemaxē erŭ pexŭ nixŭ ga nadexŭ ga Tupana, rŭ norŭ duŭxŭgŭ pixŭgŭ i ñuxmax. ² Rŭ tama name i pegŭ picuèxŭxŭgŭ. Rŭ name nixŭ i guxŭguma pemecŭmagŭ rŭ yaxna namaã pexŭnŭē i togŭ rŭ nŭxŭ pengechaŭgŭ. ³ Rŭ chanaxwae i wŭxigu perŭxŭnŭē rŭ ñoma wŭxitama i duŭxŭrŭŭ pixŭgŭ erŭ pewa nangēxma i Tupanaãē i Üünexŭ. Rŭ name nixŭ i naxcèx pedau na guxŭguma pegŭ pengechaŭgŭxŭ rŭ ngēmaãcŭ taguma tacŭcèx pegŭ pitoyexŭ. ⁴ Erŭ yixema na Cristuarŭ duŭxŭgŭ ixŭgŭxŭ, rŭ ñoma wŭxitama i duŭxŭrŭŭ tixŭgŭ. Rŭ ngēxgumarŭŭ ta wŭxitama nixŭ i Naãē i Üünexŭ i guxãwama maxŭxŭ. Rŭ ngēxgumarŭŭ ta Tupana pexŭ nade na guxãma ípenangŭxēēgŭxŭcèx i wŭxitama i maxŭ i taguma gŭxŭ. ⁵ Rŭ wŭxitama nixŭ ya tórŭ Cori, rŭ wŭxiaxŭtama nixŭ i yaxŭgŭxŭ rŭ wŭxicèxicatama nixŭ ga íbaiŭxŭ ga guxãma. ⁶ Rŭ wŭxitama nixŭ ya Tupana ya guxãnatŭ ixŭcŭ. Rŭ nŭma rŭ guxãetŭwama nangēxma rŭ guxãwama namaxŭ. Rŭ nŭma rŭ guxãxŭ narŭngŭxēē na tanaxŭxŭcèx i norŭ puracŭ. ⁷ Natŭrŭ wŭxichigŭ i yixema rŭ tanayaxu i ngēma nacŭma rŭ ngēma cuèx i Cristu tŭxna ãmarechaŭxŭ na naxŭgŭxŭcèx i norŭ puracŭ. ⁸ Rŭ ngēmacèx i Tupanaãrŭ ore i ũmatŭxŭwa rŭ ñanagŭrŭ:

“Rü yexguma daxūguxū ga naānewa naxūxgu, rü yēma tūxū nagagū ga guxema marū tūxū ínanguxūxēē nawa ga tūmaarū chixexū. Rü norū duūxūgūna nanaxā ga cuèx na ngema-maā Tupanaarū puracū naxūgūxūcèx”,

ñanagürü i ngēma ore. ⁹ Rü ñuxma Pa Chaueneēgūx, rü pexna chaca, rü çtacūchiga nixī i ngēma ore i ñaxū, “Daxūwa naxū”, ñaxū? Rü dūcax, ngēmawa nūxū tacuèx ga noxri rü ñoma ga naānegu na ínaxīxū ga nūmax. ¹⁰ Rü gumatama Cristu ga ñoma ga naānegu írūxīcū, rü gumatama nixī ga daxūguxū i naāne i Tupana íngēxmaxūwa ūxcū na guxāētūwa nangēxmaxūcèx rü guxūwama nangēxmaxūcèx. ¹¹ Rü nūmatama nixī ga guxema norū duūxēgūna naxāaxū ga tūmaarū cuèx rü tūmaarū puracū. Rü tūxū naxuneta ga ñuxre na toxnamana norū orexū tayarūxugūxūcèx. Rü toguegū rü tūxna nanaxā ga cuèx na duūxūgūmaā nūxū tixuxūcèx i ngema norū ore i tūxū nūxū nacuèxēēxū. Rü toguegū rü tūxna nanaxā ga cuèx na duūxūgūaxū tanangúchaūxēēxū i Tupanaarū ore na yaxōgūāxūcèx. Rü toguegū rü tūxna nanaxā ga cuèx na ngema yaxōgūxūarū dauruxūgū tixīgūxūcèx. Rü toguegū rü tūxna nanaxā ga cuèx na norū oremaā tangúexēētaegūxūcèx. ¹² Rü yemaācū norū duūxēgūna nanaxā ga tūmaarū puracū rü tūmamaā inananguxūxēē na ngēma yaxōgūxūxū tarūngūxēēgūxūcèx na ngēmaācū guxūma i ngēma yaxōgūxū rü yexeraācū nūxū yacuāetanūxūcèx i norū ore. ¹³ Rü Cristu nanaxwèxe na ngēma norū orewa iyaetanūxū i guxāma i yixema ñuxmatáta wūxigu aixcūma

meã yaxõgü rü meã nüxũ icuèxgü ya Tupana Nane. Rü ngẽmaãcü tá düxwa nawa tangugü na aixcüma Tupana naxwèxexũãcüma ixĩgüxũ, rü tá tiyaetanü i norü orewa ñuxmatáta ñoma Cristu ya aixcüma mexêchicürüü ixĩgü. ¹⁴ Rü tãütáma ñoma buxügürüü tixĩgü i tórü maxüwa. Erü ngẽma buxügü rü tauxchaãcü toguama narüxĩnüé. Rü ngẽxguma tacü rü to i nguxêëtaexũ naxĩnüëgu rü ngẽmawe narüxĩ ñuxmata naga naxĩnüé i ngẽma duũxügü i chixexũ i norü doramaã nawomüxêëgüxũ rü nachixexêëgüchaũxũ. Natürü i yixema rü tama name na ngẽxgumarüü ixĩgüxũ. ¹⁵ Rü name nixĩ i yigü ingechaũgüãcüma nagu taxĩ i ngẽma ore i aixcüma ixĩxũ, na ngẽmaãcü yexeraãcü naxrũü ixĩgüxücèx ya Cristu ya guxüma i yaxõgüxũãrũ ãëxgacü ixĩcü. ¹⁶ Rü taeru ya Cristuwa nixĩ i ne naxũxũ i tórü pora na naxcèx imaxèxücèx. Rü guxãma i yixema rü wüxigu naxmèxwa tangèxmagü. Rü ngẽxguma Cristugagu meã wüxigu ipuracüegu rü yigü rüngüxèëgu rü guxüma meãma inixũ. Rü ngẽmaãcü yigü ingechaũgüãcüma norü orewa tiyaetanü na düxwa nüma nanaxwèxexũãcüma ixĩgüxücèx.

Maxü i ngexwacaxüxü i Cristugagu tüxü ngèxmaxü

¹⁷ Rü ñuxma rü Cristuégagu pexũ chaxucuxè na tama nagu pexĩxũ i ngẽma chixexũ ga noxri nagu pexĩxũ ga yexguma tauta Cristuaxũ peyaxõgügu. Rü tama name i nagu pexĩ i nacümagü i ngẽma duũxügü i tama Tupanaxũ cuèxgüxũ i naëchitamare maxèxũ. ¹⁸ Erü Chataná rü nanatoõëgü i ngẽma duũxügü, rü ngẽmacèx

chixexŭguxicatama narŭxĩnŭē. Rŭ nagagugŭtama nŭxŭ nataxuma i maxŭ i taguma gŭxŭ i Tupanawa ne ŭxŭ, erŭ tama nŭxŭ nacuèxgŭchaŭ. ¹⁹ Rŭ tama naxāneē na ƭacŭ rŭ chixexŭ na naxŭgŭxŭ, rŭ ngēmacèx nagu naxĩ rŭ nŭxŭ namepua i guxŭraŭxŭ i chixexŭgŭ na naxŭgŭxŭ. ²⁰ Natŭrŭ i pema rŭ tama ngēmaācŭ na pemaxēxŭcèx nixĩ i Cristuaxŭ peyaxōgŭxŭ. ²¹ Yerŭ pema rŭ marŭ meā nŭxŭ pexĩnŭē ga Cristuchiga. Rŭ toxŭtawa naxcèx pengŭe, rŭ nŭxŭ pecuèx i norŭ ore i aixcŭma ixĩxŭ na ñuxācŭ Ngechuchu naxwèxexŭācŭma na pemaxēxŭ. ²² Rŭ ngēmacèx name nixĩ i nŭxŭ perŭxoe i ngēma nuxcŭmaŭxŭ i pecŭmagŭ ga ŭpa nagu pexĩxŭ. Yerŭ yema nuxcŭmaŭxŭ ga perŭ maxŭ rŭ nachixexŭchi. Rŭ pexŭ napora rŭ pexŭ nawomŭxēēgŭ na nagu pexĩxŭcèx ga yema pexeneārŭ ngŭchaŭgŭ i tama mexŭ. Natŭrŭ i ñuxma rŭ name nixĩ i nŭxŭ perŭxoe i guxŭma i ngēma. ²³ Rŭ ngēmacèx i ñuxma na Cristuarŭ duŭxŭgŭ pixĩgŭxŭ rŭ name nixĩ na Tupanaguxicatama perŭxĩnŭēxŭ. Rŭ name nixĩ i Tupanana pegŭ pexāgŭ na Naāē i Ūñexŭ pewa puracŭxŭcèx rŭ na nangexwacaxŭxēēaxŭcèx i peāē. ²⁴ Rŭ name nixĩ i penayaxu i ngexwacaxŭxŭ i pecŭma i Tupana norŭ ngŭchaŭmaā pexcèx mexēēxŭ. Rŭ ngēma nacŭma i ngexwacaxŭxŭ rŭ perŭ maxŭ i mexŭwa tá nangox i ngēxguma nagu pexĩxgu i ngēma ore i aixcŭma ixĩxŭ rŭ tama nawe perŭxĩxgu i pexeneārŭ ngŭchaŭ. ²⁵ Rŭ ngēmacèx i ñuxma na Cristuarŭ pixĩgŭxŭ rŭ tama name na pidoratèxgŭxŭ. Natŭrŭ name nixĩ i wŭxichigŭ rŭ tŭmamŭcŭmaā aixcŭmaxŭ tixu. Erŭ guxāma i

yixema rü yigütanüxũ i yaxõgüxũ tixĩgü. ²⁶ Rü ngẽxguma texé tacü peãewa nguxẽẽgu rü ;pegüna pedaugü na tama pecadu pexüxücèx! Rü tama name i nagu perüxinüẽẽcha natürü name nixĩ i paxa ngẽmatama i ngunexũgu nüxũ ipeyarüngüma i ngẽma naxüpa na yanaxücuxũ ya üèxcü. ²⁷ Rü pegüna pedaugü na tama penaxüchicaxücèx i Chataná na ngẽmaãcü nayoxnièxücèx rü pemaã inacuáxücèx. ²⁸ Rü ngẽxguma texé petanüwa ngĩtèèxgu ga üpa, rü name nixĩ i nüxũ tarüxo i ngẽma. Rü name nixĩ i tümamèxẽmaã meã tapuracü na ngẽmaãcü tüxũ nangèxmaxücèx i tümäärü ngẽmaxũ na toguãx ya tüxũ nataxúemaã tangauxücèx. ²⁹ Rü tama name i chixexũ i oremaã pidexagü. Rü name nixĩ i ore i mexümaã pidexagü na ngẽmaãcü ngẽma duüxũgü i pexü inüèxüxũ perüngüxẽègüxücèx na yexeraãcü Tupanaga naxĩnüèxücèx rü nataãègüxücèx. ³⁰ ;Rü pexuãègü na tama penangechaüxèèxücèx i Tupanaãè i Üünexũ! Erü ngẽma Naãè i Üünexũ nixĩ i Tupana pexna muxũ na nüxũ pecuáxücèx na aixcüma norü duüxũgü pixĩgüxũ ñuxmatáta ngẽma ngunexũ i nagu pexcèx núma naxüxũ ya Cristu. ³¹ ;Rü nüxũ perüxoe na nagu perüxinüẽèchaxũ ega texé tacü rü chixexũ pemaã üxgux! Rü ngẽxgumarũ ta name nixĩ na nüxũ perüxoexũ na aigu perüxinüèxũ, rü èxna penuèxũ, rü èxna pegü na pengaexũ, rü èxna peguxchigawèxegüxũ. Rü ngẽmaãcü name nixĩ na nüxũ perüxoexũ i guxüma i ngẽma chixexũ i dexagü. ³² Rü name nixĩ i pegü perüngüxẽègü rü pegümaã pemecümagü, rü pegüxũ pengechaütümügü i wüxichigü. Rü

ngēxguma petanüwa texé tacü rü chixexü pemaã üxgux, rü name nixĩ i pegüxü nüxü pengechaügü i wüxichigü yema na Cristugagu Tupana pexü nüxü nangechaüxürü.

5

Name nixĩ i meã namaxẽ i Tupanaxãcügü

¹ Rü ñuxma rü Tupanaxãcügü ya pexü nangechaügüxe pixīgü. Rü ngēmacèx name nixĩ i naxcèx pedau na naxrüü meã pemaxëxü rü naxrüü pimexü. ² Rü name nixĩ i pegü pengechaügü yema Cristu tüxü na ngechaüxürü. Rü nüma rü taxcèx nügü inaxã rü taxcèx nayu. Rü yemaãcü Tupanaxü nataãëxëe yerü yemaãcü tüxü namaxëxëe. ³ Rü ñuxma rü Tupanaãrü duüxügü pixīgü. Rü ngēmacèx tama name i naĩ i ngemaã rü ëxna naĩ ya yatümaã na ipepexü. Rü tama name na pexeneãrü ngúchaüwe perüxixü rü ëxna pegüna penanugüchaüxü i tacü i ngēmaxügü. Rü ngēmacèx name nixĩ i nüxü perüxoe i guxüma i ngēma chixexügü, rü bai i nachiga na pidexagümarexü. ⁴ Rü tama name i tacü rü ore i ãüächixüxü pixu, rü bai i tacü rü ngeãëxümare pixu, rü bai i texéxü pecugücüraxü. Erü ngēma ore i chixexügü rü taxuwama name. Rü narümemaẽ nixĩ i Tupanana moxë pexãgü. ⁵ Rü aixcüma pemaã nüxü chixu rü ngēxguma texé naĩ i ngemaã rü ëxna naĩ ya yatümaã ipexgu, rü ëxna tümaxüneãrü ngúchaü taxüxgu, rü taxucürüwama taxãchica i ngextá tórü Cori ya Cristu rü Tanatü ya Tupana ãëxgacü íixixüwa. Rü ngēxgumarüü ta taxucürüwama texé

ngema taxãchica ega tũgũna tananugũchaũxgu i tacũ rũ ngẽmaxũgũ. Erũ yĩxema ngẽma nacũma tũxũ ngẽxmaxẽ rũ dũxwa namaã tatupanaãx i ngẽma nacũma i chixexũ. ⁶ ;Rũ tama naga pexĩnũẽ ega texé tacũ rũ ore i ngẽãẽmarexũmaã pexũ womũxẽẽchaũgu na penaxũxũcèx i ngẽma chixexũgũ! Erũ ngẽma chixexũgũgagu nixĩ i Tupana tá poraãcũ napoxcuexũ i ngẽma duũxũgũ i tama naga ĩnũẽxũ. ⁷ Rũ ngẽmacèx tama name i ngẽma duũxũgũmaã pexãmũcũgũ na pema rũ ta tama penaxũxũcèx i ngẽma chixexũgũ. ⁸ Rũ ũpa ga pema rũ ããnexũwa peyexmagũ, yerũ tama Tupanaxũ pecuèx rũ chixri pemaxẽ. Natũrũ i ñũxma na Tupanaxũ pecuáxũ rũ tórũ Coriarũ duũxũgũ na pixĩgũxũ, rũ ngóonexũwa pengẽxmagũ. Rũ ngẽmacèx name nixĩ i duũxũgũ i ngóonexũwa ngẽxmagũxũrũũ meã na pemaxẽxũ. ⁹ Erũ ngẽxguma ngóonexũwa ingẽxmagu, rũ mexũ taxũgũ, rũ nagu taxĩ i ore i aixcũma ixĩxũ, rũ meã tamaxẽ. ¹⁰ Rũ ngẽmacèx name nixĩ i naxcèx pedau na nagu pexĩxũ i ngẽma maxũ i tórũ Cori namaã taãẽxũ. ¹¹ Rũ tama name i pema rũ ta penaxũ i ngẽma chixexũgũ i taxuwama mexũ i ngẽma togũ i duũxũgũ i ããnexũwa ngẽxmagũxũ ũgũxũ. Natũrũ narũmemaẽ nixĩ i penangoxẽẽ na nachixexũ i ngẽma naxũgũxũ. ¹² Erũ ngẽma chixexũ i cúãcũma naxũgũxũ i ngẽma yatũgũ rũ ngexũgũ, rũ woo nachiga idexagũmaregu rũ wũxi i ãnexũchi nixĩ. ¹³ Natũrũ ngẽxguma ngóonexũ nagu baxigu i tacũ rũ chixexũgũ rũ meã tá nangox na ñuxãcũ nachixexũ. ¹⁴ Erũ guxũma i tacũ i ngẽxmaxũ, rũ ngẽxguma ngóonexũwa nangẽxmagu,

rü meãma nangox na ñuxãcü yĩxũ. Rü ngẽmacèx i Tupanaãrũ orewa rü ñanagürũ:

“¡Nabaixãchi i cuma na cupexũ! ¡Rũ írũda i cuma na icuyarütaxuxũ! ¡Rũ nagu rüxĩnü na ñuxãcü nachixexũ i ngẽma curũ pecadugũ! Rü Cristu tá cuxcèx nanangóonexẽẽ rü tá cuxũ narüngũxẽẽ na Tupanaxũ cucuáxücèx”,

ñanagürũ i ngẽma ore. ¹⁵ Rü ngẽmacèx name nixĩ i pexuãëgũ rü meã pemaxẽ. Rü tama name i ngẽma duũxügũ i tama Tupanaãrũ orexũ cuèxgũxürũũãcüma na pemaxẽxũ, natürũ name na duũxügũ i meã Tupanaga ñnüèxürũ meã na pemaxẽxũ. ¹⁶ Rü ñuxma na Tupana pexũ yatauxchaãchixẽẽxũ rü ¡pepaxaãëgũ na nüxũ pepuracüexũ rü penaxüxũ i ngẽma nüma nanaxwèxexũ! Erũ ñomaücüü i duũxügũ rü poraãcü chixexũ naxügũ. ¹⁷ Rü ñuxma na ngẽmaãcü namaxẽxũ i togũ i duũxügũ, rü tama name na naxrũũ pixĩgũxũ. Rü tama name i duũxügũ i ngẽãëmæxürũũ pixĩgũ. Natürũ name nixĩ i Tupanaãrũ orewa pengúe na nüxũ pecuáxücèx i tacü na yĩxũ i tórũ Cori pexũ naxwèxexũ na penaxüxũ. ¹⁸ Rü tama name i tacü rü axexũ i ngúchixáxũmaã pengãxẽ, erũ ngẽma rü chixexũ tüxũ naxüxẽẽ i ngèxguma ngẽmaãcü imaxëgu. Natürũ name nixĩ i Tupanaãẽ i Üünexũna pegü pexãgũ na pewa nangèxmaxüçèx rü pemaã inacuáxücèx. ¹⁹ Rü name nixĩ i Tupanaãrũ orechigagu rü norũ wiyægügu pegümaã pidexagü rü pegümaã nüxũ pixu. Rü name nixĩ i nagúxüraũxũ i norũ wiyægügu pewiyægü, na ngẽmaãcü guxũne ya perũ maxũnemaã tórũ Corixũ picuèxüügüxücèx. ²⁰ Rü name nixĩ i

guxŭguma tórŭ Cori ya Ngechuchu ya Cristuégagu moxē nüxna pexāgŭ ya Tanatŭ ya Tupana naxcèx i guxŭma.

Ñuxācü meã nügŭmaã namaxē i wŭxi ya ĩpatacŭĀx i Cristuaxŭ yaxōgŭxŭ

²¹ Rŭ ñuxma na Cristumēxēwa pengēxmagŭxŭ, rŭ name nixĭ i pegŭga pexĭnŭē i wŭxichigŭ, erŭ Cristuxŭ pengechaŭgŭ rŭ naga pexĭnŭē. ²² Rŭ pemax, Pa Ngexŭgŭx, rŭ ngēma tórŭ Cori naxwèxexŭrŭŭ rŭ name nixĭ na petega pexĭnŭēxŭ. ²³ Erŭ nüma ya yatŭ rŭ namèxēru nixĭ, ngēxgumarŭŭ ya Cristu na guxŭma i yaxōgŭxŭēru na yĭxŭ. Rŭ nümagŭ i yaxōgŭxŭ rŭ Cristuxŭne nixĭgŭ rŭ nüma ya Cristu nixĭ i norŭ maxēxēēruŭ yĭxŭ. ²⁴ Rŭ ngēxgumarŭŭ na Cristuga naxĭnŭēxŭ i ngēma yaxōgŭxŭ, rŭ ngēxgumarŭŭ ta i ngexŭgŭ rŭ name nixĭ na guxŭguma natega naxĭnŭēxŭ. ²⁵ Rŭ name nixĭ i namèxŭ nangechaŭ ya yatŭ, yema Cristu guxāma ga yaxōgŭxexŭ na nangechaŭxŭrŭŭ. Rŭ yema na tŭxŭ nangechaŭxŭcèx nixĭ ga nayuxŭ ga Cristu. ²⁶ Rŭ yemaãcü nanaxŭ ga Cristu na nügŭxŭ tŭxŭ nadexŭcèx rŭ tŭxŭ yaxŭünexēēxŭcèx i guxāma i yixema na yaxōgŭxŭ. Rŭ norŭ oremaã rŭ ngēma dexá i nawa ĩbaiŭxŭmaã tŭxŭ nimexēē na aixcŭma napēxewa imexŭcèx. ²⁷ Rŭ yemaãcü tŭxŭ nimexēē na nügŭtama tŭxŭ nawéxŭcèx na aixcŭma guxŭwama imexŭ rŭ na nataxuxŭma i tacŭ i tórŭ chixexŭ rŭ bai i ĩrarŭwa i ngēxguma napēxewa ingugŭgu. Erŭ tŭxŭ nade na ixŭünegŭxŭcèx rŭ guxŭwama imexŭcèx i napēxewa. ²⁸ Rŭ yema Cristu tŭxŭ na ngechaŭxŭrŭŭ, rŭ wŭxichigŭ ya

yatü rü nanaxwèxe na namèxũ nangechaũxũ ñoma nügüxũnexũ na nangechaũxũrũtama. Rü yíxema tümamèxũ ngechaũxẽ rü tügütama nixĩ i tangechaũxũ. ²⁹ Erü tataxuma ya texé ya tümaxũnechitama aixe, natürü tanaxüwemü rü meãma nüxna tadau ngẽma Cristu guxũma i yaxõgüxũna dauxũrũ. ³⁰ Rü guxãma i yixema na yaxõgüxũ rü Cristutanüxũ tixĩgü rü ngẽmaãcü wüxigu namücügü tixĩgü. Rü nüma nixĩ i tüxna nadauxũ. ³¹ Rü ngẽmacèx i Tupanaãrũ ore i ümatüxũwa rü ñanagürü:

“Rü wüxichigü ya yatü rü nanatüna rü naẽna tá nixũgachi na namèxmaã inaxãũxçèx. Rü ngẽma taxre rü wüxi tátama nixĩgü”,

ñanagürü i ngẽma ore. ³² Rü ngẽma ore i yatüchiga rü namèxchiga rü wüxi i ore i aixcüma mexũ nixĩ. Natürü ñuxma na pemaã nüxũ chixuxũ i ngẽma rü Cristuchiga rü yaxõgüxũchiga nixĩ i chidexaxũ. ³³ Natürü ngẽma ore rü pechiga ta nixĩ. Rü ngẽmacèx i wüxichigü i pema i yatügü rü name nixĩ i pemèxũ na pengechaũxũ ngẽma pegütama na pengechaũxũrũ. Rü ngẽxgumarũ ta i pema i ngexũgü rü penaxwèxe i petega pexĩnüë.

6

¹ Pa Buxũgüx, ñuxma na Cristuarü pixĩgüxũ, rü name nixĩ i penatüga rü peega pexĩnüë, erü ngẽma nixĩ i aixcüma mexũ. ²⁻³ Yerü yema mugü ga Tupana Moĩchéna ãxũtanüwa rü yema mu ga nüxĩra wüxi ga unetamaã Tupana nüxũ ixuxũ, rü ñanagürü:

“¡Rü tüxũ nangechaũ rü tüxũ rüngüxẽẽ ya cunatü rü cue na aixcüma cutaãẽxũcèx rü namáxũcèx i curü maxũ i ñoma i naãnewa!”

ñanagürü. ⁴ Rü pemax, Pa Papágü rü Pa Mamágüx, rü tama name i penangamare rü penanuẽxẽẽ i pexacügü. Rü name nixĩ i meã penayaexẽẽ, rü peyaxucuxẽgü rü penangúxẽẽ na meã tórü Coriaxũ yaxõgüãxũcèx. ⁵ Rü pemagü, Pa Duũxügü ya Ixãärü Coriãxgüe, rü name nixĩ i meã naga pexĩnüẽ i perü corigü i ñoma i naãnewa. Rü penaxwèxe i nüxũ pengechaũgüãcüma rü nüxũ pemuũẽãcüma meã naga pexĩnüẽ ñoma Cristuaxũ pepuracüexürüũ. ⁶ Rü tama name ega perü corigü pexũ dawenüguxicatama meã nüxũ pepuracüe na ngẽmaãcü pemaã nataãẽxũcèx. Natürü ñuxma na Cristuarü duũxügü pixĩgüxũ, rü name nixĩ i guxüma i perü ngúchaũmaã penaxü i ngẽma Tupana pexũ naxwèxexũ. ⁷ Rü ngẽma puracü i perü cori pexna ãxũ, rü name nixĩ i petaãẽãcüma penaxü, ñoma tórü Cori ya Ngechuchuaxũ pepuracüexürüũ. Erü aixcüma nüxũ nixĩ i pepuracüexũ rü tama i duũxügüaxũ. ⁸ Rü name nixĩ i ngẽmaãcü meã pepuracüe, erü nüxũ pecuèx rü wüxichigü i duũxũ rü woo wüxi i coriarü duũxũ yixĩgu rü ãxna taxúxearü yixĩgu, natürü tórü Cori ya Ngechuchu tá nüxũ nanaxütanü naxcèx i ngẽma mexũ i naxüxũ. ⁹ Rü pemax, Pa Corigüx, rü name nixĩ i ngẽxgumarüũ ta meã namaã pemaxẽ i perü duũxügü. Rü tama name i tacü rü chixexümaã penaxãũxũne. Rü nüxna pecuèxãchie na pema rü ta perü duũxügürüũ tórü Cori ya daxügucümẽxëwa na pengẽxmagüxũ. Rü aixcüma guxãma i yixema rü tawüxigu i napẽxewa ya tórü Cori ya Cristu.

*Cristuarü duũxügüarü poxũruũ i Tupana nüxna
ãxũ na nügü namaã ínapoxũgũxúcèx naxchaxwa i
Chataná*

¹⁰ Rũ ñuxma na tórü Corimücügü pixĩgũxũ, Pa Chaueneẽgũx, rü name nixĩ i pegü peporaexẽẽ na penayaxuxúcèx i ngema pora i nawa ne ũxũ. Erü nüma rü naporaxüchi. ¹¹ Rũ pegü panaxú i guxũma i ngema poxũruũgü i Tupana pexna ãxũ na ngẽmamaã pegü ípepoxũxúcèx i ngẽxguma Chataná pexũ womüxẽẽchaũgu! ¹² Erü tama duũxügü i taxrũũ âmachixũ rü ãxchinaxãxũmaã nixĩ i yigü idaixũ. Natürü ngẽma namaã yigü idaixũ nixĩ i Chatanáãrũ duũxügü i ngoxogü i chixexügü i poraexũ. Rũ nümagü rü namuxũchi rü tüxũ narüporamaẽgüchaũ. Rũ tama nüxũ tadaugü erü naãẽgü nixĩ, natürü guxũwama nangẽxmagü i ñoma i naãnewa. Rũ namaã inacuèx i ñoma i naãne i chixexũ. ¹³ Rũ ngẽmacèx name nixĩ i penayauxgü i guxũma i ngẽma poxũruũgü i Tupana pexna ãxũ, na ngẽmaãcü pegü ípepoxũxúcèx i ngẽxguma ngẽma naãẽgü pexũ nachixexeẽchaũgu. Rũ ngẽmaãcü tãütáma nüxũ penguxũ i ngẽma naãẽgü i chixexũ rü tá nüxũ perüporamaegü. ¹⁴ Rũ ngemacèx name nixĩ i mea pegüna pedaugü na tama perü uwanümẽxègu peyixúcèx. Rũ penaxwae na pixaixcümagũxũ na taxuwama nachixexúcèx i perü maxũ. ¹⁵ Rũ name nixĩ i guxũguma ípememaregü na nüxũ peyarüxugüexúcèx i ngema ore i ngüxmüxẽẽruxũ. ¹⁶ Rũ ngema guxũarü yexera ixĩxũ nixĩ na aixcüma Cristuaxũ peyaxõgũxũ na ngẽmaãcü pegü ípepoxũxúcèx nüxna i Chatanáne i ãücümaxũ i namaã tüxũ nachixexẽẽchaũxũ. ¹⁷ Rũ name nixĩ i penayaxu i

ngema maxŭ i taguma gúxŭ na ngemamaã pegŭ ípexoxŭxúcèx ñoma wŭxi i churara i napatèxemaã nŭgŭ ípoxŭxŭrŭxŭ. Rŭ ngema Tupanaarŭ Ore i Naã i Ūñexŭ pexna ãxŭ, rŭ ngema nixŭ i pexne ixŭxŭ. ¹⁸ Rŭ tama name i nŭxŭ perŭchaue na peyumŭxègŭxŭ. Natŭrŭ name nixŭ i guxŭguma Tupanaã i Ūñexŭãrŭ ngŭxèẽmaã Tupanaxŭ pecèèxŭ. Rŭ penaxwae i pexuã na taguma nŭxŭ perŭxoexŭcèx. Rŭ ngemaãcŭ name nixŭ i naxcèx peyumŭxègŭ i guxŭma i Tupanaarŭ duŭxŭgŭ. ¹⁹ Rŭ ngèxgumarŭ ta chanaxwèxe i chauxcèx peyumŭxègŭ na Tupana choxŭ rŭngŭxèẽxŭcèx rŭ choxna naxããxŭcèx i ngẽma ore i nŭma nanaxwèxexŭ na nŭxŭ chixuxŭ. Rŭ chanaxwèxe i Tupanana naxcèx peca na choxŭ naporaxèẽxŭcèx na tama chamuŭãcŭma nŭxŭ chixuxŭcèx rŭ mea chanangoxèẽxŭcèx i ngema norŭ ore i Cristuchiga ga noxrŭ exŭguxŭ i ñuxma maxŭ tŭxna ãxŭ. ²⁰ Rŭ ngẽma orexŭ na chixuxŭcèx nixŭ ga Tupana nŭgŭchicŭ choxŭ inamuxŭ. Rŭ ngẽmagagu nixŭ i chapoxcuxŭ i ñuxmax. Rŭ chanaxwèxe i chauxcèx peyumŭxègŭ na tama chamuŭãcŭma meãma nŭma nanaxwèxexŭãcŭma nŭxŭ chixuxŭcèx i ngẽma norŭ ore.

Pauru nanaguxèẽ ga norŭ popera rŭ wenaxãrŭ yema duŭxŭgŭxŭ narŭmoxè

²¹ Rŭ taeneẽ ya nŭxŭ ingechaŭcŭ ya Tíquicu, rŭ chauxrŭŭ aixcŭma meãma napuracŭ i tórŭ Coriarŭ puracŭwa. Rŭ nŭma tá pemaã nŭxŭ nixŭ i guxŭma i chauchiga na ñuxãcŭ choxŭ naxŭpetŭxŭ i nuã. ²² Rŭ ngẽmacèx nixŭ i pexŭtawa chanamuxŭ, na pemaã nŭxŭ yaxuxŭcèx na ñuxãcŭ toxŭ

naxüpetüxŭ, na ngẽmaãcü pexŭ nataãẽxẽẽxüçèx.
²³ Pa Toeneẽgü i Yaxõgüxŭx, chanaxwèxe i
 Tanatü ya Tupana rü tórü Cori ya Ngechuchu
 ya Cristu pexŭ narü-ngüxẽẽgü i guxãma i pema
 na meã pegümaã pemaxẽxüçèx, rü aixcüma
 petaãẽgüxüçèx, rü pegü pengechaũgüxüçèx rü
 meã peyaxõgüxüçèx. ²⁴ Rü chanaxwèxe i Tanatü
 ya Tupana nüxŭ narüngüxẽẽ i guxŭma i ngẽma
 duũxüğü i aixcümaxŭchi tórü Cori ya Ngechuchu
 ya Cristuxŭ ngechaũgüxŭ. Rü ngẽmaãcü yĩ.

Rü nuãma pexna,
 Pauru

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

9d5dc22a-30be-5d26-85a9-76047f4c89e6